

SAUNIA E ULUFALE ATU
I LE MALUMALU PAIA



SAUNIA E ULUFALE ATU
I LE MALUMALU PAIA

O lenei tamaitusi o loo otootoina mai le
O le Malumalu Paia, saunia e
Boyd K. Packer

faavaa i luma: Malumalu o Sate Leki
faavaa i tua: Malumalu o Laie Hawaii

© Puletaofia 2002 e le Intellectual Reserve, Inc.
Ua taofia aia tatau uma
Lolomiina i le Iunaite Setete o Amerika

Faamaonia le faaPeretania: 8/02
Faamaonia le faaliliuga: 8/02
Faaliliuina o le *Preparing to Enter the Holy Temple*
Samoan

O MAI I LE MALUMALU

E tele mafuaaga e tatau ai ona manao se tasi e sau i le malumalu. E oo lava i foliga mai i fafo o le malumalu e pei e atagia mai ai ona faamoemoga loloto faaleagaga. Ua mautinoa lelei na faamoemoga faaleagaga i ona puipui i totonu. Ua tusia i luga a'e o le faitotoa o le malumalu upu e faapea: "Ua Paia i le Alii." Afai e te ulufale atu i soo se malumalu ua uma ona faapaiaina, ua e i ai i totonu o le maota o le Alii.

E tele ituaiga fale e fausia e le Ekalesia. O ia fale tatou te tapuai ai, tatou te aoao atu ai, tatou te fiafia ai, tatou te faapotopoto ai. E mafai ona tatou faavaeina siteki ma uarota ma misiona ma korama ma Aualofa i totonu o nei fale po o nisi foi fale tatou te totogiina e fai ai sauniga. Ae a tatou faatulagaina ia aiga e tusa ai ma le faatulagaga ua faaalua mai e le Alii, tatou te faatulagaina i totonu o malumalu. O le faaipoipoga i le malumalu, le sauniga lena e faamau ai, o se faamanuiaga sili-sili lea e mafai ona e maua i le malumalu paia.

E mafai e tagata agavaa o le Ekalesia ona latou maua i totonu o malumalu ia sauniga sili ona faaeaina o sauniga uma o le faaolataga ua faaalua mai i tagata. O iina e mulumulu, ma faauu, ma aoao, ma faaee, ma faamau ai le tagata i se sauniga paia. Ma a uma ona tatou maua o ia faamanuiaga mo i tatou lava, ona mafai lea ona tatou ulu atu i le malumalu ma faia ia sauniga mo i latou ua maliliu latou te lei maua lea avanoa. E faia i malumalu sauniga paia mo e o ola ma e ua maliliu. O iina e papatiso ai e o ola mo e ua maliliu.

"O mai i le malumalu." A le o le taimi nei, o se taimi lata mai. Tatalo e le aunoa, faatulaga lelei o outou soifua, faaputu se tupe e mafai ona outou maua e faamoemoe mo le aso e mafai ai ona outou o mai. Amata nei aua o nisi taimi e faigata ai ma faalotovaivai le ala i le salamo. E liua e le malumalu le tagata ma matuai tauia soo se taumafaiga maelega e ulu atu i ai. O outou o loo mamao mai malumalu, atonu o le a oo atu ia

te outou se malumalu, atonu o le a oo atu ia te outou se malumalu ae tou te lei oo mai i ai. Ia faatuatua ma faamoemoe malosi pea ma taumafai pea ia outou o mai—ma ia tauaogaina outou ma taunuu lava ona outou o mai i le malumalu.

UA PAIA IA SAUNIGA

O le faitauina maeaea lelei o tusitusiga paia e faaalua mai ai e lei ta'uina uma atu e le Alii mea i tagata uma. E i ai nisi o tulaga manaomia na faatulagaina e moomia muamua ona faatoa maua ai lea o faaaliga paia. E faapena foi i sauniga o le malumalu.

Tatou te le talanoaina sauniga o le malumalu i fafo o le malumalu. E lei faamoemoeina le malamalama o sauniga o le malumalu, mo na o ni tagata tofia toaitiiti, pe latou te taofia foi mai isi. O le mea moni o lona faafeagai. Faatasi ai ma taumafai silisili matou te uunaia ai agaga uma ina ia agavaa ma saunia mo le ulufale atu i le malumalu ma auai ai i sauniga e faia ai iina. O i latou o e ua ulu atu i le malumalu ua aoaoina atu i ai se faamoemoe e faapea: E i ai se aso o le a maua ai e tagata ola uma ma tagata uma ua maliliu, le avanoa latou te faalogo ai i le talalelei, ma talia pe teena foi sauniga o le malumalu. Afai e teena lenei avanoa, e pa'u atu lava le teenaina i luga o le tagata lava ia.

E faigofie ia faagasologa ma sauniga o le malumalu. E matafogie. E paia lava. E le faalauaiteleina o lea e le mafai ai ona tuuina atu ia i latou e lei saunia. O le fia iloa e le o se sauniuniga. O le fia malamalama i ai e le o se sauniuniga foi. O le saunia mo sauniga o le malumalu e aofia ai le uia o laasaga le masuia muamua o le: faatuatua, salamo, papatisoga, faamauina, tauaogaina, mafaufau matua ma le mamalu e tatau ai i se tasi ua valaaulia e ulu atu i le maota o le Alii.

E tatau ona tatou saunia ae tatou te lei o atu i le malumalu. E tatau ona tatou tauaogaina ae tatou te lei o atu i le malumalu. E i ai tulafono ua faatutuina e ao ina tatou usiusitai i ai. O le Alii lava na faia ae le o se tagata. Ma o loo i le Alii lava le aia ma le pule atoa na ia poloai mai ai ia tausua sauniga o le malumalu i le paia, ma 'aua ne'i faalauaiteleina.

O i latou o e uma ua agavaa ma tauaogaina i soo se auala, e mafai ona ulufale atu i le malumalu ina ia faalauiloaina atu ai iina ia sauniga paia ua faia ai.

IA AGAVAA E ULU ATU

A oo ina e lagona le taua o faamanuiaga o le malumalu faapea ma le paia o sauniga ua faia ai, o le a e le fesiligia ia tulaga ua faatuina e le Alii mo le ulu atu i le malumalu paia.

E tatau ona i ai sou pepa faataga o loo aoga pea i le taimi nei, ina ia mafai ona e ulu atu i le malumalu. E tatau ona saina e le epikopo o lau uarota ma le peresitene o lau siteki. Ae o misiona, o le peresitene o le paranesi ma le peresitene o le misiona ua i ai le tiutetauave mo le tuuina atu o pepa faataga o le malumalu. E na o i latou o e o loo agavaa e tatau ona o atu i le malumalu. O le epikopo o loo i ai le matafaioi e suesueina ai lo tatou agavaa. O lenei faatalanoaga e taua tele ia te oe i le avea ai ma se tagata o le Ekalesia, aua o se taimi lea e iloiloina ai ma se auau-na faauuina a le Alii ia le tulaga o loo agai i ai lou olaga. Afai e i ai soo se mea o loo faaletonu i lou olaga, o le a mafai e le epikopo ona fesoasoani ia te oe e faaleleia. O lenei faiga, a o ouluta talanoa ma le faamasino o Isaraelu, e mafai ai ona e faailoa atu pe fesoasoani atu ai foi ia te oe ina ia faatulagaina lou agavaa e ulufale atu i le malumalu faatasi ai ma le faamaoniga a le Alii.

Na saunoa atu ia Peresitene N. Eldon Tanner, o le sa auuina atu o se Fesoasoani Muamua i le Au Peresitene Sili, i le sauniga a o a le perisitua e uiga i faatalanoaga. O lana saunoaga e taua tele mo taitai o le Ekalesia o e o loo faia ia faatalanoaga faapea foi ma tagata o le Ekalesia o e o loo faatalanoaina. Mafaufau lelei lava i le fautuaga leni:

Atonu e aoga ia te outou epikopo ma peresitene o siteki ona faia faatalanoaga mo se pepa faataga o le malumalu i se auala faapenei:

“Ua e susu mai ia te au mo sou pepa faataga e ulufale ai i le malumalu. Ua ia te au le tiutetauave e fai ai ma sui o le Alii i le faatalanoaina o oe. I le faaiuga o le faatalanoaga o loo i ai se avanoa mo au e saina ai lou pepa faataga; ae le na o au le saina taua o loo i ai i luga o lau pepa faataga. A o lei mafai ona aoga le pepa faataga, e tatau foi ona saina e oe lava ia.

“Pe a e saina lou pepa faataga, ua e faia se tautinoga i le Alii o oe ua e agavaa mo aia ua tuuina atu ia i latou o e umiaina sea pepa faataga. E i ai ni fesili faatulagaina o le a ou tuuina atu. . . . E ao ona e tali mai ma le faamaoni i nei fesili uma taitasi.” . . .

O lea, afai ua uma ona e tuuina atu na fesili e moomia e le tagata o loo talosaga mai, atonu e te manao e faaopoopo atu se vaega faapenei: "O se tasi e ulufale atu i le maota o le Alii e tatau ona saoloto mai *soo se amioga eleelea, e le paia, e le mama, pe le tusa ai mo le tagata.*" . . .

O a tatou faatalanoaga e tatau ona faia i le alofa, ma le faautauta. E tele taimi e mafai ona faasa'oina ai ni mea pe afai e te fesili atu: "Faamata e i ai se mea o le a e popole ai pe o le a e le faamaoni ai foi i le Alii pe a e sainia lou pepa faataga o le malumalu?"

"Pe e te manao i sina taimi e faasa'o ai ni mea e patino lava ia te oe ae e te lei sainia lou pepa faataga? Ia manatua, e silafia e le Alii mea uma, ma e le ulagia o ia. O loo matou taumafai e fesoasoani ia te oe. Aua lava ne'i pepelo ina ia maua ai se valaauga, se pepa faataga, po o se faamanuiaga mai le Alii."

Afai e te faatalanoaina le tagata e pei ona ototoina atu, o le a i ai i le tagata le tiutetauave e faatalanoaina ai o ia lava. O loo i ai i le epikopo po o le peresitene o le siteki le aia i le mana e iloa ai le sa'o. O le a ia iloa pe i ai pe leai se mea atonu e le o sa'o e tatau ona faasa'o ae lei tuuina atu se pepa faataga. ("O le Faamanuiaga o Faatalanoaga Faale-Ekalesia," *Liahona*, Mati 1979, 72-73.)

O le faiga o le faatalanoaga mo le pepa faataga o le malumalu e na o le epikopo lava ma le tagata o le Ekalesia ua talosaga mai mo sona pepa faataga. E fesiligia i lena faatalanoaga le tagata ua talosaga mai i ni fesili e suesueina ai lana amio, ma lona tauaogaina, ma lona faamaoni i le Ekalesia ma ona taitai. E tatau ona faamaonia e le tagata i lena faatalanoaga o loo ia mama ma tausia le Upu o le Poto, ma totogi se sefuluai atoa, ma ola e tusa ai ma aoaoga o le Ekalesia, ma e le o auai i se faapotopotoga a tagata ua faatuiese i le Ekalesia. Ua uma ona aooina atu i epikopo le matuai taua lava le 'aua lava ne'i o latou ta'uina atu i soo se tasi ia mea latou te talanoaina ma i latou o e latou te faatalanoaina.

E agavaa le tagata mo se pepa faataga o le malumalu, pe afai e leai se mea e pona ai i fesili uma e fesili atu ai le epikopo ia te ia. Afai e le o tausia e le tagata poloaiga, pe i ai foi se mea ua le tonu i lona soifua e tatau ona faasa'o muamua, e tatau ia te ia ona muamua faaali atu fua o le salamo faamaoni, a o lei tuuina atu ia te ia se pepa faataga o le malumalu.

A uma ona faatalanoa e le epikopo le tagata, ona faatalanoa lea e se tasi o le au peresitene o le siteki i tatou uma taitoatasi ae tatou te lei o atu i le malumalu. Afai tatou te o atu mo le taimi muamua, o le peresitene o le siteki e faia le faatalanoaga.

E tatau lava ona e talia le tali a le ua tofia e avea ma faamasino ia Isaraelu, ma o le foi ua avea ma sui o le Alii e suesue pe ua tatau ona e ulu atu i le maota paia pe leai, pe a e susu atu ia te ia mo sou pepa faataga o le malumalu.

O LE TAIMI MUAMUA MA TAIMI UMA LAVA

E oo ia te oe le tau polepole pe afai o loo e alu atu i le malumalu mo le taimi muamua. O le natura lava o le tagata o le naunau lea e fia iloa se mea faatoa oo i ai. E masani ona tatou popole i ni mea fou o le a oo i ai.

Aua e te popole. O le a e ulu atu i le malumalu. O le a i ai se tasi o le a fesoasoani atu ia te oe i mea uma o le malumalu. O le a taitaia lelei oe i mea uma—aua e te polepolevale.

Pe a tatou ulufale atu i le malumalu e tatau ona tatou faaalalo. Soo se talanoaga e talafeagai e ao ona faia i le musumusu. Ae a oo i le taimi o sauniga, ia tatou ava ma migao atoatoa.

E laitiiti ni maota o i ai nei e mafai ona tatou maua ai le avanoa tatou te manatunatu loloto ai e aunoa ma se pisa. E i ai nisi o malumalu e muamua ona faapotopoto tagata o le a ulu atu e faia sauniga iina i totonu o le falelotu o le malumalu. O iina e faatalitali ai tagata sei taunuu uma atu tagata e auai i le sauniga. O le tulaga masani lava i le olaga o lo tatou le onosaia lea ona faatalitali. E masani ona oso ai le le fiafia o se tagata pe a faapea ua leva ona taunuu i le falelotu ae toe faatali foi sei taunuu atu le tagata mulimuli e atoa i ai le sauniga. Ae ua le faapena ia le malumalu. O lena taimi faatalitali o se avanoa sili lea ona matagofie. Ua maeu lava le matagofie o lena avanoa e alala filemu ai ma manatunatu ai i mea faaleagaga! O se vai malu i le agaga.

Afai e te susu mai i le malumalu, ia e manatua o oe o se ua valaaulia e maliu mai i le maota o le Alii. O se taimi lea o olioliga, ae o se olioliga filemu. E i ai nisi taimi e tatau ai ona faamanatu ia i latou o aiga ma paaga ua susu mai i le malumalu mo faaipoipoga faalemalumalusa ina ia faaitiitia i lalo o latou siufofoga i a latou saunoaga alofa ma fiafia ma faamalo atu



Potu Selesitila, Malumalu o Vernal Iuta

faapea ma le faafeiloaiga o aiga ua leva e lei feiloai. E le onomea i le maota o le Alii le saunoa leotele ma le ata leoleoa.

Ia taliaina ia faatonuga a e galulue i le malumalu. E i ai lava se tasi e taitaia oe i laasaga uma o sauniga o le malumalu.

AOAOINA MAI LUGA

Ae lei ulu atu i le malumalu mo le taimi muamua, po o soo se taimi foi ina ua uma ona e ulu atu i ai, atonu e aoga ia te oe ona e malamalama o aoaoga o le malumalu ua faia i ni auala faatusa. O le auala foi lea na tuu mai ai e le Alii, le Aoao Silisili, le tele o Ana aoaoga.

O le malumalu o se aoga sili ona lelei. O se maota e aoao ai. Ua tausia lelei totonu o le malumalu ina ia avea ma nofoaga silisili ona lelei mo le aoaoina o mataupu loloto faaleagaga. Na saunoa mai le susuga ia Dr. John A. Widtsoe, o le ua maliu o le Korama a le Toasefululua o le sa avea ma peresitene o se iunivesite aloaia ma o se alii aoaoina tautaua foi i le lalolagi. E faaaloalo tele o ia mo galuega e faia i le malumalu sa, ma na ia saunoa mai ai faapea i se tasi taimi:

Ua aofia i sauniga o le malumalu le ata atoa o le faaolataga e pei ona aoao mai e taitai o le Ekalesia, ma o loo faamalalama mai ai mataupu e faigata ona malamalama i ai. E le o suia pe fetuunai aoaoga o le malumalu ina ia talafeagai ma le ata o le faaolataga. O le atoatoa lelei o mataupu o le faaeega paia o se tasi lea o faamaoniga mautinoa o le moni o sauniga o le malumalu. E le gata i lea, a o le atoatoa o le ata ma le faamalalamagama o le fuafuaga o le Talalelei o loo tuuina mai ai, ua avea ai sauniga o le malumalu ma auala sili ona lelei e faamanatu ai le faatulagaga atoa o le talalelei.

E i ai foi se tasi faailoga ua avea ma faamaoniga ia te au o le moni o galuega faalemalumalusa. E fa vaega manino o le faaeega paia ma galuega faalemalumalusa e pei ona faaalua e le Alii i le Perofeta o Iosefa Samita . . . e mafai ona vaevaeina i ni vaega eseese se fa: O sauniga sauniuni; o faatonuga e tuuina atu i tautalaga ma ala faatusa; o feagaiga; ma le sue-suega o lo tatou malamalama. Ou te masalo e le mafai e le Perofeta o Iosefa Samita, o se e lei aoaoina i mataupu o le atamai, ona mafai e ia lava ona malamalama atoatoa i lea mea.

(John A. Widtsoe, "Temple Worship," *The Utah Genealogical and Historical Magazine* 12 [Aperila 1921]: 58.)

Na toe saunoa mai foi ia Elder Widtsoe:

O loo tatou soifua i se lalolagi o faatusa. E leai ma se mea tatou te iloa, se'i vagana ai ia faatusa. Tatou te osiosi ni mataitusi i luga o se laupepa, ma tatou faapea ane ua maua ai se upu, lea e faauigaina o le alofa, po o le inoino, po o le alofa mama, po o le Atua po o le faavavau. Atonu e le matagofie i le vaai ia upu po o se tusitusiga ua faatusa i ai se mea. E leai se tasi e fai pona i faatusa i luga o itulau o se tusi aua e le tutusa lo latou matagofie ma mea ua latou faatusaina. Tatou te le finau i mataitusi faatusa o le A-t-u-a aua e le matagofie i lona foliga mai; peitai, ua faatusa i ai le mamalu o le Atua. Tatou te fiafia uma i faatusa, pe a tatou malamalama i o latou uiga. Ou te fai atu ia te outou ua faatasi mai i le afiafi nei, outou na tou te le o maitauina le auala ua faia ai la'u tautalaga po o upu ua ou faaoga, e faapea: tou te le o maitau maia upu ua ou tautala atu ai, a o le uiga o manatu ua ou faaoga upu e faamatala ai. . . .

O loo tatou soifua i le lalolagi o faatusa. E leai se alii po o se tamaitai e ulu fafo mai le malumalu ua atoatoa ona faaeina o ia, se'i vagana ua ia malamalama i le moni o mataupu ua faaoga ia faatusa e faatusa i ai. ("Temple Worship," itulau 62.)

Afai o le a e ulufale atu i le malumalu ma manatua ia aooga ua tuuina mai ai ua na o ni faatusa, e le mafai ona e ulu atu ma le agaga sa'o, e aunoa ma lou foi mai ma le faateleina o lau silasila loloto, ma faaeaina atili, ma faateleina lou malamalama e uiga i mea faaleagaga. Ua matagofie lava le fuafuaga o le aooga. Ua musuia. Sa aoao atu foi e le Alii, le Aoao Silisili, Ana aooga i Ona soo, i tala faataoto na Ia faatusa i ai mea atonu e faigata ona malamalama i ai i se isi lava auala. Sa Ia faaoga mea na silafia ma malamalama i ai Ona soo, ma sa Ia faamatala atu e uiga i matuamoa ma tamaimoa, o manu-felelei, o fugalaau, alope, laau, tagata faomea, le goto ifo o le la, tagata mauoa ma e matitiva, fomai, lavalava soosoo, velega o vao, saluga o le fale, fafagaina o mea i tuaolo, sele-selega o saito, faaputuga o mea i fale e faaputu ai mea, fausiga o fale, tagata faigaluega totogi, faapea ma le tele o isi mea. Sa Ia fetalai foi e uiga i le fua o le sinapi, ma le penina.



Vai Papatiso, Malumatu o Uosigitone D.C.

Sa Ia finagalo e aoao atu ia i latou o e na fia faalogo mai ia te ia ina ia latou malamalama, ma o lena na Ia faaaoga ai mea faigofie na latou malamalama i ai, e avea ma faatusa. E leai se tasi o mea na Ia faatusa i ai Ana aoaoga sa le malamalama i ai i latou na faalogo atu ia te Ia; o mea uma sa Ia faaaoga, sa na o ni faatusa.

O le malumalu lava ia o se faatusa. Afai ua e silasila i se tasi o malumalu i le po pe a faamumu uma ona moli, ua e silafia foi lona matagofie tele. E te tagai atu e susulu atoa le maota o le Alii i le malamalama, ma tu matilatila ese ai lava mai le pogisa, ma faapea ona avea ai ma faatusa o le mana ma le malamalama o le talalelei a Iesu Keriso o se sulu i le lalolagi ua fai ifo lava i le pouliuli faaleagaga.

E te le malamalama atoatoa i le sauniga i le malumalu i le taimi muamua. Na o se vaega o le a e malamalama i ai. Ia e toe foi atu pea lava pea i ai. Toe foi atu e aoao. Ae foi atu pea lava pea i le malumalu e aoao, o le a e malamalama i mea sa e le malamalama i ai. O le tele o mea o le a e malamalama i ai, o mea e patino ia te oe lava ia e le mafai ona e faamatala atu i se tasi. Peitai, o ni mea mautinoa, ia te oe lava ia.

O mea tatou te maua mai i le malumalu, e tutusa lelei lava ma mea tatou te o atu ma i tatou i le malumalu i le agaga loto maualalo, ma le faaaloalo, ma le fia aoao. A tatou o atu i le malumalu ma le loto fia aoao, e aoaoina i tatou e le Agaga.

Afai e te maua le avanoa e auai atu ai i se sauniga o le faaeega paia i totonu o le malumalu po o le molimauina o se faa-mauga, mafaufau loloto i le uiga o mea o le a e silasila atu i ai o loo faatinoina. Ma afai e mavae lena asiasiga ma teuina pea na mea i lou mafaufau; o lou iloiloina ma le faateete ma le agaga tatalo o le a e iloaina ai le faateleina o lou malamalama.

O se tasi o aoga sili ona taua o aafiaga e oo i ai i le malumalu, o le maua ai lea o se vaaiga lautele atoa o fuafuaga a le Atua e faatatau i lenei lalolagi. Afai e uma ona tatou ulu i le malumalu (ma e mafai ona tatou toe foi atu e toe faamanatu) o le a tatou iloa ua tonu ma talafeagai lelei lava le gasologa o le soifuaga, ma le ata faataatia o mea uma lava. Ona tatou iloa ai lea le tulaga o loo tatou i ai, ma vave ona tatou iloa pe a tatou sese ese mai le ala sa'o.

O lea ia tepa taulai atu ai i le malumalu. Faasino lau fanau i le malumalu. Amata mai i lo latou laiti ona e faasino atu latou

i ai, ma amata ona latou sauni mo le aso latou te ulu atu ai i le malumalu paia.

I le taimi nei, ia aoainagofie oe, ia faaaloalo. Ia manatunatu loloto ma maua mea uma e te mafaia ona maua mai aoaoga—o le faatusa ma le loloto o aoaoga faaleagaga—e na o totonu o le malumalu o loo maua ai.

E umi le fuafuaga o se faaipoipoga i le malumalu. E matuai aoga lava le fuafua lelei. O le tele o taimi e tili lava alii ma tamaitai talavou faatoa masani ia faaipoipo vave i se vaiaso pe lua foi e ui ina lapatai atu i ai o la'ua matua e 'aua le faavavevave ae fuafua lelei ma le faautauta. O nisi taimi e faauigaina ai e tama ma teine talavou ia lapataiga a matua e aua le faavavevave ona faaipoipo e faapea e le mananao e faaipoipo. O le tele o taimi e ala ona le mananao le tama ma le teine e faatali, ona o lo la'ua popole ne'i tupu mai se mea e faalavelave i la la'ua fuafuaga. E i ai nisi ulugalii talavou e iloa lelei lava lo latou le mafaufau faatagata matua ma lo latou le alofa, i lo latou mananao e faaipoipo vave ma faapea ona faia ai ni fuafuaga faigata ma le tigaina e tupu ai le mafatia ma le faanoanoa, ae semanu e fiafia pe ana fuafua lelei ma le faautauta.

Afai e faatatope ma faanatinati ona faia o a tatou sauniuniga mo le malumalu, o le a le atoatoa lo tatou ulufale atu i le malumalu i le taimi muamua, po o le aso foi e faaipoipo ai. O le taimi muamua tatou te ulu atu ai i se malumalu pe faamau ai pe faaipoipo ai foi, o se aso ma se taimi lea e tasi lava le avanoa tatou te maua ai. O lona uiga e matuai taua lava ona tatou saunia lelei i ai. Ua matuai sili atu lona taua, o lea e le tatau ai ona tatou tuu soo se mea e le taua tele e faalavelave i ai. O lona uiga, e tatau ona saunia lelei mea uma ae lei oo atu i ai. E mafai ona avefa ma se aso ma se taimi sili ona faapopoleina ai pe afai e le faia nisi o mea taua seia oo i lena aso.

Afai e te vave malaga atu i se potu o le a faia ai se sauniga a o lei taitai ona amataina, ma e nofo ma maimoa i le gasolo mai o tagata, o le a e tagai atu ua latou o mai sauniuni mo le sauniga o le a faia. E lagonaina le faatupulaia o le faaleagaga ma suia ai le potu mai se potu gaogao i se faapotopotoga, po o se aofia o uso ma tuafafine o e o loo faamoemoe mo se tulaga faaleagaga e lagonaina.

Ae peitai, ona o le tele o mea tatou te pisi ai i nei aso e le mafai ai ona tatou faia lenei mea pe a tatou vave oo atu i se

sauniga. Po o le a lava se mea tatou te maua mai i le vave oo atu i se sauniga, ae faaluaina atu le taua pe a tatou o atu i le malumalu. Aemaise lava pe a tatou o atu mo le taimi muamua. E tatau ona tatou vave oo atu iina.

E pei ona e silasila i ai, o lenei auai vave atu e le mo na o le puipuiga, ae mo le mautinoaina lea o loo faatulaga lelei ia pepa faataga ma isi mea ma e mafai ona tatou fetuunaia o tatou tagata i lenei aafiaga fou. E sili atu nai lo lena. O le vave oo atu lea i le nofoaga sao ina ia mauaina le mafanafana o le agaga sao—ina ia saunia o tatou tagata mo le sauniga o le a faia.

Ua matou talanoa atu i tulaga o tagata e auai i aafiaga faalemalumalu, ae e i ai taimi e fuafuaina ai se faaipoipoga i le malumalu ae o loo i ai nisi o tagata o le aiga e le o agavaa mo ni pepa faataga o le malumalu. Atonu o le faatoafaiava po o le faatoanofotane o se tagata liliu mai ma o ona matua e le o i ai i le Ekalesia; pe atonu foi e fou mai lava i laua i le Ekalesia ua le agavaa ai mo se pepa faataga o le malumalu. Pe atonu foi o matua o ni tagata o le Ekalesia ae o se tasi o i laua e le o lava le ola ai e tusa ma faatulagaga o le talalelei ina ia maua ai se pepa faataga o le malumalu. O nei tapulaa e foliga mai o se faafitauli tele i taimi o faaipoipoga i le malumalu. O taimi nei e tatau ona matuai vavalalata ai ia aiga, lea e tatau ai ona latou faatasia ai ina ia fetufaai i nei taimi paia o le olaga. O le taofia o se pepa faataga o se tasi e le o agavaa, po o le le mafai ona valaaulia se uo e le auai i le Ekalesia po o ni aiga e molimauina le faamauga, e mafai ai ona vave tulai mai faafitauli. E mafai ona mafua ai le fiafia ma le feitagai i le taimi tonu lava o loo matuai moomia ai le filemu o mea uma, le i ai o le lotogatasi sili.

O le a le mea e tatau ona tatou faia i tulaga faapena? O le mea e le tatau ona tatou faia o le tauanau malosia lea o le epikopo. E le mafai e le epikopo i lona faamaoni ai i le avea ma faamasino o Isaraelu, ona tuuina atu se pepa faataga o le malumalu i se tasi e le o tauaogaina. Afai na te faia lena mea o lona uiga ua ia faia se mea e sili atu ona leaga mo tagata ua ia tuu atu i ai ia pepa faataga. Ma o se mea ua le faamaoni foi i le epikopo lava ia.

Pe afai e fuafuaina se faaipoipoga i le malumalu ma afai e i ai se tasi o matua po o se tasi foi o le aiga o le a le mafai ona ulu atu i le malumalu, o le lelei ona fuafua le faaipoipoga e mafai ai ona avea lena vaega ma se avanoa sili ona lelei ae le o se faafitauli.

Mafaufau i fautuaga nei. Ia valaaulia le matua e le auai i le Ekalesia, po o se tagata o le Ekalesia ua le agavaa mo se pepa faataga o le malumalu, e o atu i le malumalu ma i latou o le a auai i le faaipoipoga. E i ai se agaga ma se lagona e maua i lotoa o le malumalu lea e le mafai ona maua i se isi lava nofoaga. O nisi o malumalu e i ai ni nofoaga autu mo tagata asiati. O lotoa o le malumalu i soo se tulaga lava e matuai matagofie le tausaiaina. Ae o mea uma lava, o se nofoaga o le filemu ma le faagauloto.

Ia faatulaga se tasi e faatalitali faatasi ma lene tagata o le aiga. Ia mautinoa lava ia le tuua na o ia. E i ai nisi o tagata o le aiga o e e mafai lava ona ulufale atu i le malumalu e moli-mauina le faaipoipoga e finagalo malilie e faaalu lo latou taimi i fafo i lotoa o le malumalu faatasi ma i latou o e e le mafai ona o atu i totonu. O iina i siosiomaga o le malumalu e mafai ai ona latou faamatalatalaina atu le naunautaiga o le ulugalii ina ia faamauina i totonu o le maota o le Alii.

O le taimi lea e mafai ai ona faia ni faatosinaga malolosi atonu e le mafaia ona faia i nisi taimi. Mo se faataitaiga, e i ai nisi o lotoa o malumalu tetele e faia ai ni maimoaga i malumalu. Afai e fuafua mamao lelei e mafai ona maua ai se avanoa e fetau lelei ma manaoga o se tagata o le aiga e le o mafai ona ulu atu i le malumalu. O le le fiafia ma le le malilie, o nisi foi taimi o le tiga, i matua e le auai i le Ekalesia po o ni matua e auai i le Ekalesia ae ua le agavaa e mafai ona matuai faamaluluina lava i auala faapenei.

I nisi o malumalu e saunia ai se potu faapitoa lea e mafai ai e matua o e ua le mafaia ona ulufale atu i le malumalu ona feiloai ai ma se tasi ua agavaa e mafai ona taliina a latou fesili.

E tatau foi ona malamalama le ulugalii talavou ua leva ona tulimatai atu o laua matua i le aso o le la faaipoipoga i olaga atoa o le faatoanofotane ma le faatoafaiava. O lo la naunautaiga ina ia auai i le faaipoipoga, ma lo la le fiafia pe a la le mafaia, o se faailoga lea o le alofa faamatua. E le tatau ona le fiafia ai le ulugalii talavou. E tatau ona malamalama i ai ma fuafua foi i ai ma le faaeteete e avea o se vaega o le faaipoipoga.

Ae i ai lava foi nisi o tulaga e oo ai i le matua e le o mafai ona ulufale i totonu le lototiga ma ua le manofonofono lelei ai. O tulaga faapea o le a fetuutuunai ai le ulugalii talavou i le auala sili la te mafaia. O le fesili e mafai ona tulai mai: Pe ua tatau ai la ona ma faaipoipo i le malo ina ia mafai ai ona latou moli-



Potu o le Foafoaga, Malumatu o Sate Leki

mauina le faaipoipoga, ona ma faatalitali ai lea mo le tausaga e tasi ona faatoa ulufale atu lea i le malumalu? Ae le o le fofotonu lea i ai. O le fuafua ma le faaeteete faatasi ma le agaga tatalo i le tele lava o tulaga e mafai ai ona liuaina le faaifitauli ma avea ma se avanoa lea o le a matuai tuufaatasia ai le aiga nai lo le taimi muamua sa i ai.

E le tatau ona soona valaaulia le toatele o uo ma tagata o le uarota faapea ma isi tagata e molimauina se faaipoipoga. E tatau ona toaititi ia tagata e auai i le faaipoipoga, e aofia ai na o tagata lava o aiga e lua ma nisi o e vavalalata ma le ulugalii. E i ai taimi e faasilasilaina ai se faaipoipoga i totonu o le uarota faatasi ai ma le valaaulia ina ia taumafai uma e auai atu e tuuina atu le lagolago ma le faamalosiua i le ulugalii ua faaipoipoina. O le mea lena e ta'u o le 'aiga o le faaipoipoga. O se 'aiga o le faaipoipoga o le taimi lena e valaaulia ai uo ma paaga ma tagata uma e mananao le ulugalii e valaaulia. O le faaipoipoga i le malumalu lava ia e tatau ona paia ma e tatau ona fetufaaia e na o i latou lava e i ai so latou tulaga faapitoa i olaga o i latou e faaipoipoina.

Tatou te le ta'ua ia upu o le sauniga o le faamauga i fafo o le malumalu, ae mafai ona tatou faamatalaina le potu o faamauga o se potu e matagofie i ona teuga, ma e i ai le agaga o le filemu ma le lagona ootia, ma ua mamalu atoa i le paia o sauniga e faia ai.

A o lei o atu le ulugalii i le fata faitaulaga mo le sauniga o le faamauga o le avanoa lea i le tagata o loo taitaia le sauniga e tuuina atu ai ni fautuaga ma taliaina e le ulugalii. O nisi nei o manatu atonu e faalogoina e se ulugalii talavou i lenei sauniga.

"O le aso lenei o la oulua faaipoipoga. Ua matuai lofituina lava oulua i lagona o la oulua faaipoipoga. Ua fausia ia malumalu e avea ma maluapapa paia mo sauniga faapenei. Tatou te le o i le lalolagi. O mea o le lalolagi e le aoga iinei ma e le tatau foi ona tosina atu i ai mea tatou te faia iinei. Ua tatou o ese mai le lalolagi, ae ua tatou o mai i le malumalu o le Alii. O le aso sili lenei ona taua o o oulua olaga.

"Na oulua fananau mai i lenei lalolagi e auala mai i ni matua o e na saunia se tino faaletino mo o oulua agaga e mau ai. Ua uma foi ona papatisoina oulua. O le papatisoga o se sauniga paia ua faatusa i ai le faamamaina, ma le maliu ma le toetu, ma le tulai mai i le ola faafouina. E aofia ai le salamo ma

le faamagaloina o agasala. O le faamanatuga o le sauniga lea e toe faamanatu ai feagaiga o le papatisoga, ma e mafai, pe a tatou ola e tusa ai ma feagaiga ua tatou osia, ona tumau le faamagaloina o a tatou agasala.

“O oe le faatoafaiava, ua uma ona faauuina oe i le perisitua. Na muamua faaee atu i ou luga le Perisitua Arona ma e le tau-mate sa e umia tofi uma o lena perisitua—tiakono, aoao, ma le ositaulaga. Ona oo mai lea o le taimi na e agavaa ai e mauaina le Perisitua Mekisateko. O lena perisitua, le perisitua mau-luga, ua ta’ua o le peisitua ua faatulagaina e tusa ma le tofi sili ona paia a le Atua, po o le Perisitua Paia ua Faatulagaina e Tusa ma le Tofi o le Alo o le Atua. (Tagai i le Alema 13:18 ma le Helamana 8:18.) Na tuuina atu foi ia te oe se tofi i le perisitua. Ua avea nei oe ma se toeaina.


“Ua taufai maua uma o oulua faaeega paia. Ua tuuina atu ia te oulua i lena faaeega paia ni faamanuiaga e faavavau e mafai ona oulua maua pe a oulua faamaoni. Ae o nei mea uma, o ni laasaga po o ni sauniga muamua ia ua faia e te lua saunia ai mo lo oulua o mai i le fata faitaulaga ina ia faamauina o se tane ma le ava mo le olaga nei ma le faavavau atoa. Ua avea nei oulua ma se aiga, ua saoloto i le foafoaina o le ola, ua maua le avanoa e ala i le alofa ma le tautiga e aumaia ai fanau i le lalolagi ma tausua i latou ma faafaileleina i latou i o latou olaga faitino; ina ia vaai atu ia i latou o malaga mai i se aso, e pei ona oulua o mai, e auai i nei sauniga paia o le malumalu.

“Ua oulua o mai i lo oulua lava lotomalie, ma ua faamasinoina oulua ma ua oulua agavaa. O lenei faatasiga e mafai ona faamauina e le Agaga Paia o le Folafolaga.”

O lenei, ou te auina atu ai nei ia te outou le isi Fesoasoani i luga o outou a’u uo, e mau ai faatasi i o outou loto, o le Agaga Paia lava o le folafolaga; o le isi Fesoasoani lea na ou folafolaina atu i o’u soo, e pei ona faamauina i le molimau a Ioane.

O lenei Fesoasoani o le folafolaga lea ua ou tuuina atu ia te outou o le ola faavavau, o le mamalu lava o le malo selesitila. (MFF 88:3–4.)

“O le taliaina e le tasi o le isi i le feagaiga o le faaipoipoga o se tiutetauave tele lea, ma o loo tauaveina ai foi ma ni faamanuiaga e le mafaatusalia.”



O Se Vaaiga mai le Potu o le Faatoaga, Malumalu o Los Angeles Kalefonia

Atonu o le a matuai ootia le faatoanofotane ma le faatoafaiava i le faaipoipoga o le a le mafai ai ona faalogologo lelei—i upu o le sauniga o le faamauga. E ui e le mafai ona tatou ta'uta'uina ia upu o lena sauniga i fafo atu o le malumalu, ae mafai ona tatou toe foi atu i nisi taimi e molimauiina ai se faaipoipoga. O le Alii e agalelei lava na Ia tuu mai ai ia i tatou lena avanoa. O ia avanoa, pe afai tatou te le o matuai aafia tele ai, e mafai ai ona tatou faalogologo ma le totoa i upu o le sauniga. E faapena foi, pe afai e toe foi faafia atu e fai ma sui o i latou o e ua mali-liu, e mafai ona tatou faafouina ai le mafaufau ma le agaga e uiga i le aafia o le faaeega paia.

Afai na oulua faaipoipo muamua i se sauniga faalemalo, atonu e te manao nei ina ia faamauiina mo le faavavau, ma, afai ua i ai se lua fanau, ia faamauiina i latou ia te oulua i se sootaga faaleaiga e faavavau. Afai e te agavaa mo lenei mea, atonu o lou avanoa silisili lea e maua ai lenei faamanuiaga.

E LAEI PAPA'E

Pe a tatou faia ia galuega o sauniga i totonu o le malumalu tatou te laeiina ia laei papa'e. O lenei laei o se faailoga lea o le mama ma agavaa ma le le pona.

Afai e te ulufale atu i le malumalu, e sui ou laei e te susu atu ma oe i laei papa'e o le malumalu. O loo i ai i le malumalu ni potu laiti, lea e i ai ni pusatu ma se vaega e mafai ona sui ai le tagata lava ia. E puipuia lelei ou tulaga uma faaletagata i totonu o le malumalu. A o e tuuina ou laei i totonu o le pusatu ua e tuuese atu foi ia popolega ma atugaluga ma mea e faalavelave ai iina. E te laa ese mai lena potu laitiiti ua e laei papa'e ma ua e lagonaina le tasi o oe ma i latou uma o loo i le malumalu aua ua latou laei papae uma foi faapei o oe.

Afai e te alu atu i le malumalu mo le taimi muamua, ia talanoa ma lou epikopo. Afai na te tuuina atu ia te oe se pepa faataga, o le a ia faamatala atu ia te oe ia laei e tatau o le a moomia i totonu o le malumalu. E leai se mea e te popole ai i le mauaina o nei laei. E mafai ona e faatauina mai i Faletusi o le Ekalesia, ae o nisi taimi, e nonoina mai lea i le malumalu. O le vaega mulimuli e i ai se tau talafeagai e moomia lea e totogina ai le faamamaina o le laei. O laei e nonoina atu e le maua i malumalu laiti.

E pei lava foi o sauniga ma faatinoga o le malumalu, tatou te le tautatala tele e uiga i le laei o loo ofuina i totonu i fafo atu o le malumalu. E mafai ona tatou faapea ane e i ai sona uiga loloto faatusa, e pei foi o sauniga.

O se faailoga o le ava ma le migao pe a asiasi atu ia tagata o le Ekalesia i le malumalu o loo laei ma teteu i se auala na te lagonaina ai se faalogona lelei i luma o le Alii. Manatu foi pe a faapea e valaaulia oe e te susu atu i le maota o se taitai aloaia. Ua faailoa atu ia te oe faapea o le a outou fegalegaleai faatasi ai ma ni malo faaaloaloga o e na mauaina foi ni valaaulia faapena. O le valaaulia o se faailoga lea ua matuai faaaloaloga oe e le tagata na auina atu le valaaulia. Ua e iloaia e toatele foi isi e matuai faatauaina ia se valaaulia faapea, ae ona o se mafuaaga ua le valaauliaina ai i latou ma ua le mafai ai ona auai atu. Talu ai ona o le mamalu o lena faatasiga, atonu e te le susu atu i ai ma ou lavalava faigaluega po o ou ofu taalo foi. E le tau-mateina foi le le mafai ona susu atu i ai se alii ma sana soesa e le faamamaina po o se tamaitai ma sona ulu e ve'uve'ua.

O tagata mamalu ma aoaoina, afai e valaaulia i se faatasiga taua, e masani lava ona fesili po o a ni laei e tatau ma onomea ona laei ai. Faamata e te le saunia lelei mo se valaaulia taua faapena? Atonu foi e te susu atu ma faatau mai ni ou laei fou e faatatau ia talafeaga lelei ma le mamalu o lena faatasiga.

E iloa foi le ava ma le faaaloalo i le faamama ma le auli lelei o ou laei. E te lagona lava le maasiasi pe a le tusa ai ou laei ma au teuga ma le faatasiga.

O le avanoa e asiasi atu ai i le malumalu atonu e mafai ona faatusatusa i se valaaulia faapena.

E na o le tasi lava le taimi e valaaulia atu ai tagata o le Ekalesia i totonu o le malumalu i o latou laei e masani ai pe a latou molimauina se faaipoipoga faalemalumalusa. I taimi faapena, e na o seevae e aveese ae sui i ni seevae papa'e o le malumalu. O se tulaga lea ua leva ona faataga e le Usoga, e faatatau lea mo aiga ma uo e fia auai i le faaipoipoga ae le mafai ona auai i le sauniga atoa o le faaeega paia.

E ulufale atu ia faatoanofotane ma faatoafaiava i le malumalu ina ia faaipoipoina mo le olaga nei ma le faavavau atoa. E laeiina e faatoanofotane ia ni ofu papa'e e uumi lima, e faigofie le suiga ma e leai ni teuga se tele. E laei papae foi ia

faatoanofotane. O alii e malaga mai e molimauina ia faaipopoga i le malumalu e le laeiina ni peleue uumi i lalo (tuxedo).

Matou te le malamalama ma tau faanoanoa foi i nisi taimi, pe a auai atu i le malumalu, ma vaai ai i nisi ua susu mai mo se faaipopoga po o le auai foi i se sauniga i le malumalu ae o loo laei mai e pei lava o loo alu i se tafaoga po o se taaloga.

O le avanoa e ulu atu ai i le malumalu e tatau lava ona tuu i ai lo tatou fai mea lelei atoatoa. E fialia le Alii pe a tatou taelele ma laei mama, ae le o ni ofu taugata naua. E tatau ona tatou laei lelei e pei o loo tatou laei atu mo le sauniga faamanatuga ma faatasiga aloaia e valaaulia i ai i tatou.

E i ai nisi taimi e oo mai ai se tasi e molimauina se faaipopoga ae lei utagiaina le fautuaga na tuuina atu e le Usoga e uiga i laei ma teuga e tatau ai, ma lapataiga e uiga i le 'aua le faataitai i tu a le lalolagi e faatatau i sitaile eseese o lavalava, o le teuga o le ulu, ma isi tulaga uma faapena. Matou te maofa pe aisea e le manatunatu ai se tagata ua matua ma ua mafai ona ulu atu i le malumalu ma iloaina e le fialia le Alii ia i latou o e matuai iloga lava lo latou matele atu e mulimuli i ala o le lalolagi.

E mafai faapefea e se tagata ua umia se pepa faataga ona auai atu i le malumalu i ni laei e faaletonu ma faalelalolagi? E faapefea ona teu e se tasi lona ao i se teuga e le talafeagai ma le tu mamalu ma aoaoina?

Afai e te maua le avanoa e alu atu ai i le malumalu ma auai i sauniga o le malumalu pe molimauina se faamauga, ia manatua po o ai oe. O oe o se malo valaaulia i le maota o le Alii. E tatau ona e teteu ma laei lelei i se auala e te lagonaina ai se faalogona lelei pe afai e faaali mai Le ua valaauliaina oe.

O i latou o e ua umia ma fetufaaia ia faamanuiaga o le perisitua e tatau ona ufiufi lelei o latou tino e pei ona sa faaalua atu i le Perofeta o Iosefa Samita ina ua tuuina atu ia te ia le sauniga o le faaeega paia.

O tagata o e ua mauaina o latou sauniga o le malumalu e laeiina se ofu faapitoa pe a maea. O ofusa o loo saunia lea e se vaega o le Ekalesia—ma e masani lava ona tuuina atu i le lalolagi atoia i se polokalama e tufatufaina atu ai o loo faagaioia e le Ekalesia.

O le ofu o se faatusa lea o feagaiga paia. E uunaia ai le ufiufiina lelei o le tino ma avea o se talita ma le puipuiga i le tagata e ofuina.

O le laeiina o lea ofu ua le taofia ai tagata o le Ekalesia mai le laeiina o laei matagofie ma tatau ai i atunuu eseese o le lalolagi. Ua na o lavalava ua le ufiufia lelei ai pe ua mataga foi le sitaili ua le talafeagai ai ma le ofuina o le ofusa. Soo se tagata o le Ekalesia, e tusa pe ua ulu o ia i le malumalu pe leai, e tatau ona manao ia aloese mai le faaaogaina o ni lavalava e le malu puipuia ai le tino.

Atonu e i ai ni taimi o le a fesiligia ai tagata o le Ekalesia ua maua faaeega paia e uiga i le ofusa.

E i ai se taimi sa valaaulia ai se uso o le Au Pulega Aoa o lauga i se faatasiga a taitai ma faiaoga o le aoga a le Neivi i le Aoga i Newport, i Rhode Island. Sa aofia ai i le faapotopotoga nisi o failotu maualuluga a le fuavaatau mai le lotu Katoliko, Porotesano, ma Iutaia.

I le taimi o fesili ma tali sa fesili atu ai se tasi o failotu, "E mafai ona e ta'uina mai ia i matou se mea e uiga i le ofu pito i totonu o loo ofuina e nisi o alii Mamona o loo i ai i le malo?" O le uiga o le fesili, "Aisea tou te faia ai lena mea? Pe o se mea ua ese? Pe i ai ea sona faafitauli?"

I le failotu na tuuina atu le fesili sa tali atu i ai le failauga i se fesili: "O fea le ekalesia e te susu mai ai?" Sa ia tali mai ma ta'u mai se tasi o ekalesia Porotesano.

Na ia faapea atu, "I le olaga i aso taitasi ae le gata i lea pe a taitaia foi ia sauniga mo le malo, pe e te le ofuina ea ni ofu o se faifeau?" Na tali atu le failotu e na te ofuina.

Sa ia faaaauu: "Ou te matea la e i ai se taua ia te oe, o lona uiga e faaesea ai oe mai le faapotopotoga atoa. I se isi faaupuga, o lau togiga lea o le galuega. E le gata foi i lea, ae ou te matea e i ai foi sona uiga taua. E faamanatu atu ai ia te oe po o ai oe ma ou matafai oi faapea ma au feagaiga. O se faamanatu faifaipea o oe o se faifeau, ma e te manatu o oe o se auuuna a le Alii, ma e ao foi ia te oe ona e ola i se auala e te agavaa ai mo lou tofi na faauuina ai oe."

Ona ia saunoa atu lea ia i latou: "E tatau ona outou malamalama i se tasi o pogai ua ala ai ona i ai i tagata o le Au Paia o Aso e Gata Ai se tautinoga loloto faaleagaga e uiga i le ofusa. O se tasi o eseese tele o a outou tapuaiga ma la matou Ekalesia, o le le totogia lea o a matou faifeau e pei o outou. Ua taitaia aulotu o la matou ekalesia e ni tagata ua tofia mai aulotu lava ia. O i latou o ni alii ua tofia mai soo se galuega



Potu Terasitila, Malumatu o Sate Leki

lava. Ae peitai, ua faauuina i le perisitua. Ua latou umia tofi i le perisitua. E faamanuiaina ma tofiaina i latou i tofiga taitai e pei o peresitene, fesoasoani, ma taitai i vaega eseese. Ua aofia ai foi tamaitai i ia tofiga ma tulaga taitai. O le alii ua faauluulu i ai la matou faapotopotoga i le Aso Sa e avea ma epikopo e mafai ona alu e faigaluega i le Aso Gafua i le falemeli, po o se ofisa, po o se faifaatoaga, po o se fomai; po o se vaaleletau po o se ofisa o le neivi. O ia lena ua faauuina o se faifeau e tusa ma ala faatonuina o la matou Ekalesia, faapei foi ona tofia o outou i ala fuafuaina o a outou Ekalesia. O le a faaaloogia foi o ia i lena tofi e le tele o malo. Ua taua foi ia i matou lena ofu e pei ona taua ia te outou o o outou laei faafaifeau. E na o le pau le eseese, matou te ofuina lena ofu i le pito i totonu ae le pito mai i fafo, aua o loo matou galulue i galuega eseese e faapoopo atu i la matou auaunaga i le Ekalesia. O nei mea paia matou te le fia faaalialia atu i le lalolagi.”

Ona ia faamatalaina atu lea faapea e i ai foi ni uiga loloto faaleagaga, e o faatasi ma le ofuina o lenei ofusa faapea ma feagaiga o loo osia i totonu o le malumalu. Matou te le moomia ona talanoaina nei mea—e le faapea o ni mea faalilolilo, ae ona ua paia.

O le ofusa, ua ufiufi ai le tino, o se mea faitino ma vaaia lea e faamanatu ai feagaiga ua osia. Ua avea ma talita puipui mo le toatele o tagata o le Ekalesia pe afai e feagai le tagata o loo ofuina ma ni faaososoga. O se faatusa o lo matou ava i tulafono a le Atua—e aofia ai ma faatulagaga o le ola mama.

O LE MANA E FAAMAU AI

Afai tatou te fia malamalama i le talafaasolopito ma le mataupu o galuega o le malumalu, e tatau ona tatou malamalama i le mana e faamau ai. E tatau ona tatou malamalama i le taua tele o ki o le pule e faaoga ai le mana e faamau ai.

E toetoe iva selau tausaga a o lumanai ia Keriso, na oo atu ai ia Elia i totonu o lotoa o le tupu o Isaraelu. Sa ia tauaveina se pule paia: o le mana e faamau ai.

Na faatinoina e Elia lana galuega, na faauuina ia Elisaia e suitulaga ia te ia, ona—ma o le vaega taua lenei—e lei maliu o ia. E pei foi o Mose lea na muamua atu ia te ia, na liua o ia.

Ina ua mavae lena, e na o le faatasi ona vaaia lona igoa i totonu o le Feagaiga Tuai, i le fuaiupu e sosoo ma le fuaiupu mulimuli o le Feagaiga Tuai. O iina na valoia ai e Malaki le toe foi mai o Elia ina ia “faaliliuina loto o matua i fanau, ma loto o fanau i o latou matua,” ne’i taia le lalolagi atoa i le faafanoga. (Tagai i le Malaki 4:5–6.)

Ua maliu atu Iesu i le laueleele o Kaisareia Filipi, ona fesili atu ai lea o ia i ona soo, ua faapea atu, Pe se a le upu a tagata ia te au le Atalii o le tagata, po o ai?

Ona latou fai mai ai lea, O le upu a isi o oe o Ioane le Papatiso: a o isi, o Elia, a o isi, o Ieremia, po o se tasi o le au perofeta.

Ona fetalai atu ai lea o ia ia te i latou, A o outou, pe se a la outou upu ia te au, po o ai?

Ona tali mai ai lea o Simona Peteru, ua faapea mai, O oe o le Keriso, le Alo o le Atua soifua.

Ona tali atu ai lea o Iesu ua faapea atu ia te ia, Amuia oe Simona Paiona; aua e le se tagata na ia faaali atu ai ia te oe, a o lo’u Tama o i le lagi.

Ou te fai atu nei ia te oe, O Peteru oe, ou te ati a’e foi la’u ekalesia i luga o lenei papa, e le mafaia foi e faitotoa o seoli ona manumalo i ai.

Ou te avatu foi ia te oe ki o le malo o le lagi; o se mea foi e te fusifusia i le lalolagi, e fusifusia foi lea i le lagi: o se mea foi e te tala i le lalolagi, e tatalaina foi lea i le lagi. (Mataio 16:13–19.)

Ina ua malaga atu faatasi ia Peteru, Iakopo, ma Ioane ma le Alii i le Mauga o Liua, o iina na tutu faatasi ai le Alii liua ma isi tagata e toalua. Na latou iloina i la’ua ia o Mose ma Elia, o e na oo mai e tuuina mai i lena au peresitene ia le mana o faamauga. (Tagai i le Mataio 17:1–8; ia maitauina o le upu *Elias* o le faaliliuiga faa-Eleni o le upu Eperu o le igoa *Elijah* ma e masani ona faaaogaina i le Feagaiga Fou e iloagofie ai ia Elijah, le perofeta o le Feagaiga Tuai.)

O Peteru na te umiaina ia ki. O Peteru e umiaina le mana e faamau ai, le pule lena o loo tauaveina ai le mana e fusia pe faamauina ai i le lalolagi pe tatalaina ai i le lalolagi ma o le a faapena foi i le lagi.



Potu Selesitila, Malumalu o Provo Iuta

I le T.A. 34, ina ua mavae Lona faasatauroina, na talai atu ai le Alii i Sa Nifae. Na Ia fetalai atu ia i latou—ma o se mea ofofofia lenei i le talafaasolopito faatusitusigapaia—ia mataupu e lua mulimuli o Malaki (lea o loo aofia ai le valoaga e faapea o le a toe foi mai ia Elia), ma poloaiina i latou ina ia tusia, ona ia faamalamalama atu lea o ia mataupu ia i latou.

Ina ua afio ifo le agelu o Moronae i le Perofeta o Iosefa Samita e ta'u atu ia te ia e uiga i papatusi, na ia sii maia foi le valoaga a Malaki e faapea o le a toe foi mai ia Elia. O lenei upusii ua avea nei ma vaega e lua o le Mataupu Faavae ma Feagaiga.

Ina ua mavae le sefulutolu tausaga talu ona oo mai ia Moronae, sa oo ina fausia se malumalu mo le faatauunuina o lona valoaga, ma sa toe faaali mai foi le Alii ma sa afio mai o Ia faatasi ma Elia ma tuuina mai ia ki o le mana e faamau ai.

O na ki o loo i le Peresitene o le Ekalesia—i le perofeta, tagatavaai, ma le tali faaaliga. O lona mana paia e faamau ai o loo i ai nei i le Ekalesia. E leai se mea e faatusalia lona paia pe a mafaufau i ai i latou o e iloaina le taua o lenei pule. E leai se mea e sili atu ona fusia faatasi ai. E toaitiiti lava alii ua umia lenei mana e faamau ai i soo se vaitaimi o le lalolagi—i totonu o malumalu taitasi e i ai ni alii o e ua tuuina atu i ai le mana e faamau ai. E leai se tasi e mafai ona mauaina se'i vagana ua maua mai le perofeta, tagatavaai, ma le tali faaaliga ma o le Peresitene O le Ekalesia a Iesu Keriso o le Au Paia o Aso e Gata Ai pe mai ia i latou o e ua faasafuaina atu i ai ina ia tuuina atu i isi.

“NA MA'UA VAAI I LE ALII. . . .”

O le aso na toe foi mai ai ia Elia o se aoauli o le Aso Sa, le aso 3 o Aperila, 1836. Sa faia se sauniga faamanatuga i totonu o le Malumalu o Katelani. Na faamatalaina e le Perofeta lona aoauli i ni upu faigofie nei:

Sa ou fesoasoani i le afiafi i isi peresitene i le tufatufaina atu o le Taumafataga a le Alii i le Ekalesia, ina ua talia lea mai le Toasefulu ma le Toalua, o e na i ai le aia e faia le sauniga i le laulau paia i lenei aso. Ina ua uma ona faia lenei sauniga i o'u uso, ua ou tuumuli atu i le pulelaa, ma tuuina ifo ie puipui ona ma punonou ifo lea faatasi ma Oliva Kaotui, i le tatalo faatauana ma le le leoa. Ina ua ma tutu

a'e mai lea tatalo, o lenei faaaliga vaaia ua faaavanoaina mai ia i ma'ua uma. (MFF 110, folasaga.)

Na aveeseina le ie puipui mai o ma'ua mafaufau, ma vaaiga o o ma'ua malamalama ua faaavanoaina.

Ua ma vaaia le Alii o loo tu mai i luga o le si'o o le pule-laa i o ma'ua luma; o lalo ifo foi o ona aao ua i ai se galuega teuteuina o le auro lelei, ua lanu faapei e mumu sesega.

O ona fofoga e pei o le afi mumu; o lauao o lona ao e sina-sina e pei o le kiona mama; a e sili le pupula o ona fofoga i lo le pupula o le la; ma o lona siufofoga e pei o le taalili o vai tetele, o le siufofoga lava o Ieova, ua faapea mai:

O a'u le muamua ma le mulimuli; o a'u o le o loo ola, o a'u o le na fasiotia; o a'u o lo outou fautua i le Tama.

Faauta, ua faamagaloina a oulua agasala; ua mama oulua i o'u luma; o lea, ina faaea ia o oulua ulu ma olioli.

Ia olioli loto o oulua uso ia olioli foi loto o lo'u nuu uma, o e ua atiina a'e lenei fale i lo'u igoa, i lo latou malosi.

Aua faauta, ua ou talia lenei fale, o lo'u igoa foi o le a iinei; ma o le a ou faaali a'u lava i lo'u nuu i le alofa muti-mutivale i lenei fale.

Ioe, afai e tausia e lo'u nuu a'u poloaiga, ma le faaleaga-ina lenei fale paia, o le a faaali o a'u lava i a'u auauna, ma tautala atu ia te i latou i lo'u lava leo.

Ioe, o loto o afe ma sefulu o afe o le a matua olioli ona o faamanuiaga o le a liligi mai, ma le faaeega ua tofia ai a'u auauna i lenei fale.

O le a faasalalau atu foi le tautaua o lenei fale i nuu mamao; o le amataga foi lenei o le faamanuiaga o le a liligi atu i lo'u nuu. E faapea lava. Amene.

Ina ua faaiuina lenei faaaliga vaaia, ua toe tala le lagi ia i ma'ua; ma ua oo mai Mose i o ma'ua luma, ma tuuina mai ia i ma'ua ki o le faapotopotoina o Isaraelu mai itu e fa o le lalo-lagi, ma taitaiga o ituaiga e sefulu mai le laueleele i matu.

Ina ua uma lea, ua oo mai Elaia, ma tuuina mai le auga-tupulaga o le talalelei a Aperaaamo, ua faapea mai ai ona o i ma'ua ma a ma'ua fanau o le a faamanuiaina ai tupulaga uma o le a mulimuli ia te i ma'ua.

Ina ua faaiuina lenei faaaliga vaaia, o se tasi o faaaliga vaaia sili ma le matagofie ua faafuasei ona oo mai ia i ma'ua:

aua o Elia le perofeta, o le na aveina i le lagi ae lei tofo i le oti, ua tu mai i o ma'ua luma, ma faapea mai:

Faauta, ua oo mai lava le aso na tauina e le fofoga o Malaki—ua molimau mai o le a auina mai o ia [Elia], a o lei oo mai le aso tele ma le matautia o le Alii—

E faaliliuina ai loto o tama i fanau, ma fanau i tama, ina ne'i taia le lalolagi atoa i le fetuu—

O lea, o ki o lenei augatupulaga ua tuuina atu ia te oulua; o le mea foi lenei, lua te iloa ai ua latalata mai le aso tele ma le matautia o le Alii, ua i faitotoa lava. (MFF 110:1–16.)

Ua tupu! O lenei mea ofoofogia na faataunuuina e aunoa ma le iloa e le lalolagi, ae o le a aafia ai le taunuuga o agaga uma o e sa ola po o le a feola mai. Sa amatamata lemu lava ona faataunuuina o ia mea. Ua avea foi le Ekalesia ma se ekalesia fau malumalusa.

Ua fou lauusi a'e foi i atunuu eseese o le lalolagi ia faalapotopotoga ma sosaiete ma tagata eseese o e ua naunau lava e saili o latou gafa. Na faatupuina lena manao i tagata talu le oo mai o Elia i le Malumalu i Katelani.

Na amata mai lava i lena aso, le aso 3 lea o Aperila o le 1836, ona liliu atu loto o fanau i o latou tama. O lena foi na le toe faia ai sauniga mo na o le olaga nei, ae faapea foi ma le faavavau. Na tuuina mai foi i lena faaaliga le pule e faamau ai. E leai se tasi pule e sili atu i lena pule lona taua. O le pule lena e talia ma fusia faavavau ai sauniga uma e faia mo e o ola ma e ua malilili.

UA FAATULAGA LELEI LE FAIGA O MEA UMA

Ina ua mavae atu mea ofoofogia na tutupu i le Malumalu i Katelani, sa faapea ona sosoo mai ai ma faigata ma sauaga lea na moomia ai le siitia ese atu o le Au Paia. Soo se mea lava sa latou faamautu ai, sa faaaliga atu ai e le Alii ia fuafuaga ina ia fausia ia malumalu. Sa faamaonia lava lenei mea i Initipene ma Sisifo Mamao, i Misuri. O le vaitaimi lena na oo ai i le Au Paia ni sauaga matuitui lava, ma sa oo ina latou malaga atu ai i Navu, i le setete o Ilinoi. Sa toe oo ifo foi ia i latou iina le faaaliga ma le poloaiga ina ia latou fausia se maota o le Alii.

Sa fetalai mai le Alii o le pogai o le fausiaina o le malumalu o le faaaliga mai ai lea o sauniga. “E moni, ou te fai atu ia te

outou, ia fausia lenei fale i lo'u igoa ina ia ou faaali atu ai a'u sauniga i lo'u nuu. Aua ou te loto ina ia faaali atu i la'u ekalesia mea ua natia pea a o lei faavaeina le lalolagi, o mea tau le augatupulaga o le atoatoaga o aso." (MFF 124:40–41.)

Na Ia fetalai mai e faapea o le malumalu o se nofoaga lea mo outou e faia ai a "outou faauuga, ma a outou mulumuluga, ma a outou papatisoga mo e ua oti, ma a outou faapotopotoga paia, ma a outou mea faamanatu mo a outou taulaga e osia e atalii o Levi, atoa ma a outou faaaliga i o outou nofoaga sili ona paia tou te maua ai talatalaga, ma a outou tulafono ma faamasinoga, mo le amataga o faaaliga ma le faavae o Siona, ma le mamalu, viiga, ma le faamanuiaga o ona matata . . . ua faauuina i sauniga o lo'u fale paia, o le ua poloiaina ai pea lo'u nuu ia fausia i lo'u igoa paia." (MFF 124:39.)

O nisi o sauniga tatou te faia i totonu o le Ekalesia e i ai ia: papatisoga, faamanatuga, faaigoaina ma le faamanuiaina o pepe, faamanuiaina o e mamai, faamanuiaina o tofiga i le Ekalesia, faauuina i tofi i le perisitua. E le gata i lea, a o sauniga mauululuga foi o loo faia i malumalu. O sauniga ia e i ai mulumuluga, faauuga, faaeega paia, ma le faamauiina e faavaavau ua ta'ua o le faaipopoga i le malumalu.

O le a se taua o ia sauniga ia i tatou o tagata o le Ekalesia?

Pe mafai ona e fiafia, pe mafai ona togiolaina oe, pe mafai foi ona faaeaina oe e aunoa ma ia sauniga? O le tali: Ua matuai fautuaina lava ina ia tatou mauaina ma e matuai manaomia lava ma sili atu foi le moomia. E sili atu ona taua. E matuai *taua* lava mo i tatou uma taitoatasi.

Na saunoa le Perofeta o Iosefa Samita e faapea e masani ona fesiligia soo o ia i le fesili:

"Pe le mafai ea ona faasaoina i matou e aunoa ma le mauaina uma o na sauniga, ma isi?" Sa ou tali atu, Leai, e le maua le atoatoaga o le faolataga. Na fetalai Iesu, "E tele mea e nonofo ai i le maota o lo'u Tama; ana leai, po ua ou fai atu ia te outou; ou te alu e sauni se mea e nonofo ai outou." O le upu *maota* sa tatau ona faaliliuina o le malo; ma o soo se tasi e faaeaina i le maota silisili, e tatau ia te ia ona ia ola i le tulafono faaselesitila, faapea foi ma le tulafono atoa. (*History of The Church of Jesus Christ of Latter-day Saints*, iloiloaina e B. H. Roberts, 7 volumna [Aai o Sate Leki: O le Ekalesia a Iesu Keriso o le Au Paia o Aso e Gata Ai, 1949], 6:184.)



Potu Selesitila, Malumalu o Sate Leki

Na saunoa mai Peresitene Iosefa Filitia Samita:

Ou te le popole po o le a le tofiga e te umiaina i totonu o le Ekalesia lenei, atonu o oe o se aposetolo, po o se peteri-aka, po o se faitaulaga sili, po o se isi lava mea, ae peitai e le mafai ona e mauaina le atoatoaga o le perisitua seiloga ua e ulu atu i le malumalu o le Alii ma mauaina nei sauniga ua saunoa i ai ia perofeta. E leai se alii e mafai ona ia maua le atoatoa o le perisitua i fafo atu o le malumalu o le Alii. (Joseph Fielding Smith, *Elijah the Prophet and His Mission* [Aai o Sate Leki: Deseret Book Co., 1957], itulau 46.)

Na matou talanoa atu muamua i sauniga maualuluga lea e faataunuaina i totonu o le malumalu. Ua aofia ai i ia sauniga le faaeega paia. O le uiga o le upu faaee o le faatamaoigaina, po o le tuuina atu lea i se tasi o se mea silisili ona taua e tumau e faavavau. E tolu auala e faatamaoiga ai le tagata e le faaeega paia: (a) e tuuina atu ai i le tagata le mana mai le Atua. "E faa-ee ai i le tagata le mana mai luga." (e) E tuuina atu ai i le tagata le poto ma le malamalama. "Latou te maua ai se aoaoga e uiga i le fuafuaga ma le finagalo o le Alii." (Bruce R. McConkie, *Mormon Doctrine*, 2nd ed. [Salt Lake City: Bookcraft, 1966], itulau 227.) (i) A oo ina faamauina le tagata i le fata faitaulaga, e tuu atu ia te ia faamanuiaga maoa'e, ma mana, ma mamalu o ni vaega o lona faaeega paia.

E lua faamalamalama o le faaeega paia ua tusia ma lomina ma faasalalaina, o le faamalamalama muamua lava na tuuina mai e Peresitene Polika Iaga:

Ou te fia tuu atu mo outou se faamalamalama puupuu. O lou faaeega paia, o le mauaina lea o sauniga uma i totonu o le Maota o le Alii, lea e mafai ai ona e ulu atu i le afioaga o le Tama pe a e mavae atu ma le olaga lenei, i lou tuuina atu lea i agelu o e tutu o ni leoleo faitotoa ia upu tatala, o faailoga ma faatusa o le Perisitua paia, ma maua ai lou faaeega e faavavau e ese mai le lalolagi ma seoli. (*Discourses of Brigham Young*, tuufaatasia e John A. Widtsoe [Salt Lake City: Deseret Book Co., 1971], itulau 416.)

Na faamatalaina e Elder James E. Talmage le faaeega paia e faapea:

O le Faaeega Paia i le Malumalu, e pei ona faia i malumalu i ona po nei, o loo aofia ai faatonuga e faatatau i le taua ma

le faasologa o tisipenisione ua mavae atu, ma le taua o le tisipenisione sili ma le faatumutumuina lenei o le talafaasolopito o le lalolagi. Ua aofia i ia faatonuga le faamanatuina o mea sili ona taua o le foafoaga, ma le olaga sa i ai o tatou uluai matua i le Faatoaga o Etena, ma lo la'ua le usiusitai ma le tulieseina o i la'ua mai lena faatoaga matagofie, faapea ma le olaga sa la'ua i ai i le lalolagi pagatia sa la'ua galulue ai ma le afu o o la'ua mata, o le fuafuaga o le togiola lea e mafai ai ona togiolaina ia le agasala sili, o le vaitaimi o le liliuese tele, o le toefuataiiga o le Talalelei faatasi ma pule ma aia uma sa i ai anamua, o le taua o le ola mama ma amiotonu i le olaga nei, ma le matuai usitai i tulaga uma e moomia e le Talalelei. (James E. Talmage, *The House of the Lord* [Salt Lake City: Bookcraft, 1962], itulau 99–100; o loo sii mai le *The House of the Lord*.)

O lenei saunoaga mai ia Elder Talmage o loo faamanino mai ai e faapea pe a e mauaina ou faaeega paia o le a e mauaina ia faatonuga e faataui i le faamoemoega ma fuafuaga a le Alii i le foafoaina ma le faatagataina o le lalolagi. O le a aoaoina ai oe i le mea e tatau ona fai ina ia e maua ai le faeaea.

O faamanuiaga o le faaeega paia e moomia mo le atoatoaga o le faeaea. E tatau ona saili ia tagata uma o le Au Paia o Aso e Gata Ai ina ia agavaa mo lenei faamanuiaga ma ia mauaina.

O sauniga o le mulumuluga ma le faauuina e masani ona faataui i ai i totonu o le malumalu o muai sauniga. O le a matuai lava ma talafeagai mo o tatou faamoemoega le faapea atu: e o faatasi ma le faaeega paia ia le mulumuluga ma le faauuga—ma e ui lava ua na o ni sauniga faatusa, ae ua folafola mai ai ni faamanuiaga e le gata ina mafai e le tagata ona maua i le taimi nei, ae faapea foi ma le lumanai.

E le gata i ia sauniga, ae e faaofuina foi oe i le malumalu i le ofu sa ma folafola atu ia te oe ni faamanuiaga matagofie e faataui i ai. E taua lava ona e faafofoga lelei a o tuuina atu ia sauniga ma e taumafai e manatua faamanuiaga e folafola mai ai ia te oe, faapea foi ma auala e te mauaina ai.

O le sauniga e faamau ai o le sauniga lena e fusia ai aiga e faavavau. O le faaiipoipoga i le malumalu o se sauniga e faamau ai. Pe a faamauina se ulugalii i totonu o le malumalu pe a mavae se faaiipoipoga faalemalo, o fanau e faananau mai ia te i la'ua a o lei oo i lena taimi, e lei fananau mai i totonu o le



Potu Selestita, Malumalu o San Diego Kalefonia

feagaiga, e faamauina i latou ia i la'ua i se sauniga puupuu ma le paia.

Faamolemole ia mautinoa o loo faatulaga lelei lou olaga. E faatoa maua lenei mea mai le mauaina lea o ou faamanuiaga o le malumalu, o ou sauniga, aua “o sauniga o i ai, ua faaalii ai le mana o le amioatua.” (MFF 84:20.)

FEAGAIGA PAIA

Na fetalai mai le Alii i le faaaliga ua ta'ua o le mataupu lona 132 o le Mataupu Faavae ma Feagaiga:

Aua faauta, ou te faaalii ia te oe se feagaiga fou faavavau; afai foi e te le usitai i lena feagaiga, e tausalaina oe; aua e leai se mafai ona teena lenei feagaiga ae faatagaina e ulu atu i lo'u mamalu.

Aua o i latou uma o e maua se faamanuiaga mai ia te a'u e ao ina tausia tulafono na atofaina mo lena faamanuiaga, atoa ma ona tulaga, e pei ona faatuina a o lei faavaeina le lalolagi. (MFF 132:4–5.)

Na faamatalaina e Peresitene Iosefa Filitia Samita le feagaiga fou e faavavau i upu nei:

O le a le feagaiga fou e faavavau? Ou te faanoanoa lava ona e i ai nisi o tagata o le Ekalesia ua malamalama sese e uiga i le feagaiga fou e faavavau. *O le feagaiga fou e faavavau o le aofaiga atoa lea o feagaiga uma ma tautinoga o le talalelei.* (Joseph Fielding Smith, *Doctrines of Salvation*, 3 vols. [Salt Lake City: Bookcraft, 1954–56], 1:156; na siitia mulimuli ane ma avea o *Doctrines of Salvation*.)

O lenei feagaiga e aofia uma ai sauniga o le talalelei—o sauniga sili ona maualuluga o loo faatinoina i totonu o le malumalu. Ina ia toe sii maia le saunoaga a Peresitene Samita:

O lenei la ua matuai manino lelei le uiga auiliili o le feagaiga fou e faavavau. *O mea uma lava—o le atoatoaga lea o le talalelei.* O lea la, o le faaipoipoga e lelei ona faataunuuina, o le papatisoga, faauuga i le perisitua, o mea uma lava—*o feagaiga uma, o tautinoga uma, o faatinoga uma e faatatau i le talalelei a Iesu Keriso, lea ua faamaufaailogaina e le Agaga Paia o*

folafolaga e tusa ma lana tulafono ua tuuina mai, o se vaega o le feagaiga fou e faavavau. (Doctrines of Salvation, 1:158.)

I le fuaiupu na siitia mai muamua (Mataupu Faavae ma Feagaiga 132:4) na matuai manino ai lava le fetalai mai o le Alii: “. . . aua e leai se mafai ona teena lenei feagaiga ae faatagaina e ulu atu i lo’u mamalu.”

O i latou o e o atu i le malumalu e maua le avanoa e tauave ai i o latou luga ni feagaiga patino ma ni tautinoga e faatatau i lo latou faaeaga faapea ma isi. Na tusia e Elder James E. Talmage:

O sauniga o le faaeega paia e aofia ai ni matafaioi maoti i le vaega a le tagata, e pei o le feagaiga ma le folafolaga ina ia tausia ai le tulafono o le legavia, ma agalelei, ma alofa, ma faapalepale, ma mama; ma o le a ia tuuina atu ana taleni ma mea uma mo le talaiga o le upumoni ma mo le atiinae o le lelei o tagata; ma o le a ia faamaoni i le upumoni ma le siitiaina i luga o le aiga tagata; ina ia faatumauina le faamaoni i le upumoni; ma fesoasoani malosi atu i soo se mea ina ia mafai ona saunia le lalolagi e taliaina lona Tupu,—le Alii o Iesu Keriso. Ua folafola mai i feagaiga ma tautinoga taitasi, se faamanuiaga e mafai ona maua i le faamaoni i le tausiga o feagaiga paia ua osia. (*The House of the Lord*, itulau 100.)

Tatou te osi feagaiga ma le Alii o le a tatou tuuina atu lo tatou taimi, ma taleni, ma a tatou mea uma mo Lona malo.

O i tatou o ni tagata osi feagaiga. Ua tatou osia ni feagaiga e tuuina atu lo tatou taimi ma a tatou tupe ma taleni—o mea uma ua tatou maua—i le atiinae o le malo o le Atua i le lalolagi. O lona uiga, tatou te osi feagaiga o le a tatou faia mea lelei. O i tatou o ni tagata osi feagaiga, ma o le malumalu o le faatumutumuga lea o a tatou feagaiga. O le puna lea o le feagaiga.

O mai i le malumalu. E tatau lava ona outou o mai i le malumalu. O iina tou te faamanatu ai feagaiga ua outou osia, a o avea outou ma sui o se tasi ua maliu. Tou te faamanatu ai foi faamanuiaga silisili faaleagaga e maua i le maota o le Alii.

Ia outou faamaoni i feagaiga ma sauniga o le talalelei. Ia outou agavaa mo ia sauniga paia i lea laasaga ma lea laasaga a o faagasolo pea o outou olaga. Ia faamamalu i feagaiga e faatatau i ai. A outou faia lena mea, o le a outou fiafia.

O le a faatulagaina sa’o foi o outou olaga—ma faatulaga tonu foi mea uma i le faasologa e tatau ai. Ona fusia ai lea o oe ma lou aiga i le faatulagaga e le mafai ona motusia.

O loo totonugalemu i feagaiga ma sauniga ia faamanuiaga lea e mafai ona outou mauaina i totonu o le malumalu paia. E mautinoa lava le fiafia o le Alii pe a tatou agavaa mo le faaupuga: O se tagata tausī feagaiga.

E LE AUNOA MA FAAFITAULI

O malumalu o le totonugalemu lea o le malosiaga faaleagaga o le Ekalesia. E tatau ona tatou faamoemoe o le a tau-mafai le tiapolo e faalavelave ia i tatou i le aveā ai ma Ekalesia faapea ma i tatou o tagata taitoatasi a o tatou taumafai e faataunuu lenē galuega paia ma le musuia. E mafai ona auala eseese mai e ala i sauaga matautia faapei o sauaga na oo ia i latou na tauasaina le galuega i le amataga ina ia le naunau i ai i le galuega. O sauaga mulimuli ane atonu o sauaga sili ia ona matautia ma malolosi e taofia ai galuega o le malumalu.

O galuega o le malumalu e tele naua ia feteenaiga e aumaia ai aua o le puna lea o le malosi tele faaleagaga i le Au Paia o Aso e Gata Ai, ma le Ekalesia atoa.

I le faapāiāga o le maa tulimanu o le Malumalu o Logan, na saunoa ai ia Peresitene George Q. Cannon:

Soo se maa faavae e faataatiaina mo se Malumalu, ma o soo se malumalu lava e faamaeaina e tusa ai ma le faatulagaga na faalia mai e le Alii mo lana Perisitua paia, e faaititia ai le mana o Satani i le lalolagi, ma faateleina ai le mana o le Atua ma le Amioatua, e faagaoioia ai le lagi i le mana sililiese mo i tatou, ma liligi ifo ma valaauina ifo i o tatou luga ia faamanuiaga o le Atua Faavavau, faapea ma i latou o e mau faatasi i lo latou afioaga. (I le “The Logan Temple,” *Millennial Star*, 12 Nov. 1877, itulau 743.)

Pe afai e i ai ni faafitauli po o ni tulaga e atugalū ai loto ma mafaufau o tagata o le Ekalesia, o se mea e masani ai i latou lo latou o atu i le malumalu. O se nofoaga lelei e avatu i ai o tatou atuatuvalega. O totonu o le malumalu e mafai ona tatou maua ai le malamalama faaleagaga. O iina, i le taimi tatou te faia ai ona sauniga, ua tatou “o ese ai mai le lalolagi.”

O se vaega tele o le taua o lo tatou ulu atu i le malumalu o le tatou faia lea o sauniga mo i latou ua le mafai ona latou faia ia sauniga mo i latou lava. A o tatou faia le faaeega paia mo se tasi ua maliu, o le a tatou tau le popole e ole atu i le Alii e fesoasoani mai ia i tatou. Afai e feagai ni ulugalii laiti ma ni faaiuga e faia, afai e latalata atu i latou i se malumalu e matuai taua tele lava le auai atu i se sauniga. O loo i ai i le siosiomaga faaleagaga o le malumalu se vaega e faamama ma faamalamalama ai.

O nisi taimi ua mamafa ai lava o tatou mafaufau i faafitauli, ma le tele o mea e tatau ona tatou faia i le taimi e tasi, ua le mafai ai ona tatou mafaufau lelei ma vaai faalelei. O le malumalu e to'ā ai le nenefu o faafitauli, e mavae atu foi ia puao o mea tiga, ma mafai ai ona tatou "vaai" atu i mea sa tatou le mafai ona iloa atu ma sailia se auala e foia ai o tatou faafitauli lea tatou te lei iloaina muamua.

O le a faamanuiaina i tatou e le Alii a o tatou auai atu i galuega o sauniga paia o le malumalu. O le a le gata ai o tatou faamanuiaga i le na o le auauna atu i le malumalu. O le a faamanuiaina i tatou i mea uma lava tatou te faia. O le a tauaogaina i tatou mo le fesoasoani a le Alii i a tatou mea uma e faaleagaga ma faaletino.

AGAI ATU I LE VELI

E tatau ona tatou maua se malamalama i le mafuaaga tatou te fausia ai malumalu, ma le mafuaaga o sauniga o loo faia ai iina. A maea ona maua lena malamalama e faaauau pea lava ona aoaoina ma faamalamalamaina i tatou i mataupu taua faaleagaga. E oo mai lea malamalama pe a mavae le aoaoina o i tatou i lea fuaiupu ma lea fuaiupu, o lea mataupu ma lea mataupu, seia oo ina tatou maua uma se atoatoaga o le malamalama ma le poto atoa. Ona ave lea o lea malamalama ma lea poto ma puipuiga ia i tatou—e aoaoina i tatou taitoatasi. O se puipuiga foi mo le Ekalesia.

E leai lava se isi galuega e puipuia atoatoa ai le Ekalesia nai lo galuega faalemalumalu ma le suega o gafa lea e lagolago atu i ai. E leai se isi galuega e sili atu le faaleagaga e maua ai. E leai lava se isi galuega tatou te faia tatou te maua ai le mana e sili atu le malosi. E leai se isi galuega e tatau i ai le amiotonu a'ia'i.

E faaofuina i tatou e galuega o le malumalu i se talita ma se puipuiga mo le tagata lava ia, faapea foi ma le Ekalesia atoa.

O sauniga o le malumalu lea tatou te osi feagaiga ai ma Ia—o iina lea e avea ai i tatou ma ni tagata o le feagaiga.

Afai tatou te talia le faaaliga e faatatau i galuega o sauniga o le malumalu, afai tatou te osia ia feagaiga e aunoa ma le masalosalo, o le a puipuia i tatou e le Alii. O le a tatou maua musumusuga e tatau ai mo luitau o le soifuaga e oo mai ia i tatou.

Ua moni ia galuega ua faia i malumalu. Na faaaliga mai i talaatu o le veli ma o loo faaauauina pea lava ia faaaliga.

E mafai ona oo mai faaaliga i tagata taitoatasi o le Ekalesia e faatatau i galuega o le malumalu.

O lea, o mai i le malumalu—o mai e ave o outou faamanuiaga. O se galuega ua paia.



O LE EKALEZIA A
IESU KERISO
O LE AU PAIA O ASO
E GATA AI

SAMOAN



36793 890